

韓
文
類
譜

韓文類譜卷第四

韓子年譜

起貞元十五年止二十年

丹陽洪興祖慶善

十五年己卯秋爲徐州節度推官

董晉行狀云十五年二月三日丞相薨公之
將薨命其子三日歛旣歛而行於行之四日
汴州亂汴州詩云健兒爭誘殺留後又曰母
從子走者爲誰大夫夫人留後兒時陸長源
爲御史大夫知留後事長源欲峻法繩驕兵
爲晉所持不克行晉卒軍亂殺長源孟叔度

仁穎公從晉喪以出而汴州亂公義當從喪
又知汴必亂故去之爾此日足可惜贈張籍
云州家舉進士選試繆所當馳辭對我策章
句何煒煌聞子高第日正從相公喪公去年
領進士試而籍預選故籍祭公詩云北游偶
逢公盛語相稱明公領試士司首薦到上京
一來遂登科不見苦貢場唐諱行錄云籍貞
元十五年擢進士第也公詩又云夜聞汴州
亂繞壁行徬徨我時留妻子倉卒不及將俄
有東來說我家免罹殃乘船下汴水東去趨

彭城時公妻子自汴之徐也從喪朝至洛旋走不及停假道經盟津出入行澗岡甲午憇時門臨泉窺闢龍是年二月乙亥朔甲午二十日也行行二月暮乃及徐南疆僕射南陽公宅我睢水陽即與東野書云主人與余有故居余符離睢上者南陽公張建封也符離舊隸徐州公答李翱書云僕之家本窮空重遇攻劫謂汴州亂時又云其所以止而不去者以其心誠有愛於僕也謂建封也公行狀云武寧張建封奏爲節度推官得試太常寺

協律郎九月一日上建封書論晨入夜歸事
其後有諫擊毬書及詩舊史云發言真率無
所畏忌操行堅正拙於世務公豈拙於世務
者特不能取容於俗耳

或云公諫擊毬詩云新秋朝涼未見日
公早結束來何爲而論晨入夜歸書在
九月不當云其後也余默默念之後見
唐本乃作新雨朝涼未見日新雨字本
史記日者傳與山石詩所謂升堂坐階
新雨定同義也以是知諫擊毬之爲第

二書蓋審也洪本亦只作新秋蓋洪亦未嘗考及此也

歐陽生哀詞云十五年冬余以徐州從事朝正于京師詹爲國子助教將率其徒伏闕下舉余爲博士會監有獄不果上答張徹云及去事戎轡謂入武寧幕也畢事驅傳馬謂明年朝正而歸也徐泗豪節度掌書記廳石記云南陽公自御史大夫豪壽廬三州觀察使授節移鎮徐州歷十一年建封自貞元四年牧徐至此首尾十二年唐地理志云濠初作豪

元和三年刺史崔公表請其事由是改爲濠
取水名也退之作記時尚爲豪或作濠誤矣

按杜佑通典濠州本鍾離郡隋改曰濠
州因濠水爲名音豪煬帝復置鍾離郡
唐武德八年爲濠州佑上通典在貞元
十年則濠本不爲豪洪蓋爲地里志所
誤爾

是年有崔翰墓誌記云南陽公文章稱天下
按史云建封能辨論禮賢下士有文章傳于
時也

十六年庚辰

與東野書云去年春脫汴州之亂遂來于此
及秋將辭去因被留以職事默默在此一年
矣歸彭城詩朝正回徐作也云天下兵又動
謂十五年秋令諸道兵討吳少誠前年關中
旱謂十四年冬京師饑去年東郡水謂十五
年秋鄭滑大水齟齬詩云河堤決東郡老弱
隨驚湍即此也鄭滑水見於舊史新史紀志
皆不書夏五月題下邳李生壁云余黜於徐
州將西居於洛陽汎舟清泠池泊於文雅臺

下西望商州東望脩竹園入微子廟求鄒陽
枚叔司馬相如之故文按公將西居于洛則
下邳當作下邳下邳貞觀中屬泗元和中屬
徐商州一作商丘是也公黜於徐蓋以諛言
無所忌雖建封之知己亦不能容也是年五
月十三日庚戌建封卒十五日壬子徐軍亂
公以十四日題李生壁則建封未死時已去
徐矣

按本紀云五月壬子建封卒

去夏贈張籍詩云李翱觀濤江今夏遊微子

廟而翺在焉蓋公春末與東野書云習之娶
吾亡兄之女期在後月則翺今夏已從公於
下邳矣亡兄即弁也公在洛中與衛中行大
受書曰足下喜吾復脫禍亂不當安安而居
徐徐而來也白樂天哀二良文云隴西薨浹
辰而師亂南陽薨翌日而難作初公從晉喪
至偃師而汴軍始亂及建封卒徐軍亂而公
已去徐故云復脫禍亂也送僧澄觀詩唐本
注云十六年詩云洛陽窮秋厭窮獨即今年
秋也

公是冬如京師縣齋有懷詩所謂求官
去東洛犯雪過西華乃此時也公河之
水詩亦今年作故曰我徂京師不遠而
還是也

十七年辛巳

公今年在京師有將歸贈孟東野房蜀客詩
云倏忽十六年終朝苦寒飢公自貞元二年至
京師今來從調選前後十六年諱行錄云房
次卿字蜀客房武墓誌云男次卿有大才公
祭房君文云五官蜀客即次卿也與汝州盧

郎中薦侯喜狀云去年愈從調選本欲携持
同行及春末自京還怪其久絕消息五月初
至此自言爲閣下所知撫言云貞元十八年
權德輿主文陸儔貞外通榜帖韓文公薦十
人上四人曰侯喜侯雲長劉述古韋紆其次
六人沈杞張訢遲汾李紳張俊餘李翊而
權公三榜共放六人訢紳俊餘不出五年之
外皆捷矣公薦侯喜於盧陸當在今年或明
年也本集韋紆作韋羣玉俊餘作俊餘是年
有李楚金墓誌

按公薦侯喜於盧汝州實在今歲之秋
盧汝州盧虔也喜嘗爲盧作復黃陂記
見歐公集古錄公今年三月自京還夏
秋居于洛喜五月至洛七月二十二日
與公釣魚溫水洛北惠林寺有題名尚
存其薦喜於盧蓋是秋也薦於陸僖恐
在來歲之首唐制取士雖柄文專於禮
侍然叅佐差擇亦勅下乃定公上陸書
云執事之與司貢士相知誠深矣考其
時似已拜命矣張俊餘唐科第錄諸本

皆作後餘撫言誤矣韋羣玉韋珩也撫
言作紆亦誤公書曰羣玉京兆之從子
也京兆指韋夏卿也夏卿之弟正卿之
子曰珩曰瓘柳子厚有寄珩詩云回眸
炫晃別羣玉獨赴異域穿蓬蒿羣玉蓋
珩之字也公豈有所避而以字行耶珩
亦二十一年進士

十八年壬午調授國子四門博士

是年二月有送陸欽州序時公在京師縣齋
有懷詩云兩府變炎涼三年就休假求官去

東洛犯雪經西華塵埃紫陌春風雨靈臺夜
公歷佐汴徐二府以十六年休居于洛往來
京師者三年於今矣求官去東洛言自洛來
京師也撫言云崔羣佐宣州幕愈與羣論交
書云僕自少至今從事於往還朋友間一十
七年自貞元二年至今十七年又云僕無以
自全活者從一官於此轉困窮甚謂爲四門
博士即答張徹云省選逮投足也又云洛邑
得休告華山窮絕陁倚巖睨海浪引袖拂天
星磴蘚澹拳局梯颺颺伶俜悔狂已斷指垂

誠仍鐫銘公爲博士後謁告歸洛因遊華山
但不知在今年或明年爾

按公除四門博士當在去歲之秋或冬
首也洪樊二譜皆以爲今年誤也公貞
元十九年上京兆尹李實書首云將仕
郎前守四門博士是上書之日官已滿
矣唐制博士皆二年滿施士句由四門
助教至爲太學博士秩滿當去諸生輒
留公今年與崔羣書亦曰官滿便終老
嵩下以滿日計之當自十七年始也又

公論停選舉狀曰臣雖非朝官月受俸
錢停選舉在十九年七月是公是月猶
在職也而公與李實書曰今年以來不
雨者百餘日盜賊不敢起考之史十九
年自正月至七月不雨是公官滿上書
當在是年秋冬之交也蓋公在御史位
之日甚淺進學解云暫爲御史遂竄南
夷又縣齋詩曰雖陪彤庭臣詎縱青冥
靶皆可考也使公果由博士遷御史固
不應稱前官亦不應尚以此書佞李實

也其初除爲十七年無疑矣况議締袷
狀亦在十七年自足參究洪以公縣齋
有懷詩兩府變荒涼三年就休假謂自
十六年至十八年故以除官在今年又
以荅張徹詩省選逮投足亦在今年按
三年就休假蓋統十五年而言也公是
年二月去汴及秋方從張建封之辟是
亦可以休假言也公十八年首春即以
一書薦十士於陸倕二月陸出刺歙公
送行有序考其辭意蓋皆已仕于朝也

況公明年上陳京書云去年春嘗得一
進謁其後如東京取妻子是公在春末
已謁告挈家矣豈可尚以休假言也省
選逮投足亦十六年冬求官去東洛之
日也不應公再到京而後衆選也公是
夏西還遂登華山古意詩唐本云五月
壁路難攀援乃此時也公來歲未貶陽
山之前初未嘗出京也樊又以爲登華
山在十六年蓋泥於犯雪過西華之語
然是時公方求官寧復謁告其考益踈

矣

李肇國史補云愈好奇與客登華山絕峯度不可返發狂慟哭爲書與家人別華陰令百計取之乃下沈顏作贅書以爲肇妄載豈有賢者輕命如此考公詩則知國史補乃實錄也

按沈顏作登華言其略曰仲尼悲麟悲不在麟也墨翟泣絲泣不在絲也且阮籍縱車於途途窮輒哭豈始慮不至耶蓋假事諷時致意於此爾文公憤趨榮

貪位者若陟懸崖險不能已至顛危踣蹶然後歎不知稅駕之所焉可及矣原沈之意似與洪所引異也

是年有施士正墓誌馬彙行狀

十九年癸未拜監察御史冬貶連州陽山令

去年與崔羣書云左車第二牙無故動搖脫去而齒落詩云去年落一牙則此詩今年作也哭楊兵曹凝陸欽州慘云人皆期七十纔半豈蹉跎數出知己決自然白髮多公今年三十六矣李翱云慘貞元十八年四月以祠

部員外郎出刺歎卒于道柳宗元云凝守兵部郎中貞元十九年正月卒哭二公詩在今春也凝爲兵部而云兵曹者隋嘗改兵部爲兵曹禮部爲儀曹也禘祫議云今月十六日將仕郎守國子監四門博士臣韓愈獻議按史云十九年三月丁卯以今年孟夏禘饗前議太祖懿獻之位未決至此禘祭方正太祖東向之位已下列序昭穆其獻祖祔于德明興聖之廟每禘祫年就本室饗之則議禘祫在今春也

褹袷議當在十七年已辨於歷官記矣
況初議之日陳京以考功員外郎與公
同議及今年陳已再遷給事中矣益信
公除博士之果在十七年也洪只以褹
在今年而不考始議非今年也詳見前
論今年權停選舉狀云伏見今月十日勅今
年諸色選舉宜權停者按史云十九年秋七
月以關輔饑罷吏部選禮部貢舉則議舉選
在今秋也上李實尚書書稱前守四門博士
時已罷博士未受御史之命書云愈來京師

於今十五年自貞元五年公復來京師至此十五年矣順宗實錄云是時春夏旱京畿乏食實一不以介意方務聚斂徵求以給進奉勇於殺害人吏不聊生書云今年已來種不入土而盜賊不敢起穀價不敢貴老嫗宿賊銷縮摧沮稱其所長止此而已自博士拜監察御史是時有詔以旱饑蠲租之半有司徵愈急公與張署李方叔上疏言關中天下根本民急如是請寬民徭而免田租之弊天子惻然卒爲幸臣所讒貶連州陽山令幸臣李

實也進學解云暫爲御史遂竄南夷祭張署
文云貞元十九君爲御史余以無能同詔並
峙余贛而狂年未三紀明年而三紀周矣又
云我落陽山以尹鼯猱歲弊寒兇雪虐風號
縣齋有懷云捐軀辰在丁鍛翽時方禘禘祭
二月也辰在丁其奏疏之日乎史云公上章
數千言論宮市德宗怒貶陽山令疏今不傳
寄三翰林詩云拜疏移閣門爲忠寧自謀天
子惻然感司空歎綢繆謂言即施設乃返遷
炎洲公之被絀坐論此兩事也司空即杜佑

是年拜檢校司空同中書門下平章事又云
同官盡才俊偏善柳與劉或慮語言泄傳之
落寬離宗元禹錫與公同爲御史劉柳方進
用則公被絀宜矣岳陽樓別竇司直云愛才
不擇行觸事得譏謗永貞行云吾嘗同僚情
可勝皆謂劉柳也

按公陽山之貶寄贈三學士詩敘述甚
詳而皇甫持正作公神道碑亦云因疏
關中旱饑專政者惡之則其非爲論宮
市明矣今公集有御史臺論天旱人饑

狀與詩正合況皇甫持正從公遊者不
應公嘗疏宮市而不及之也然公寄三
學士詩尚云或自疑上疏上疏豈其由
則是又未必皆上疏之罪也又曰同官
盡才俊偏善柳與劉或慮言語泄傳之
落冤讎又岳陽樓詩云前年出官由此
禍最無妄茲猜畏彈射斥逐恣欺誑是
蓋爲王叔文韋執誼等所排矣德宗晚
年韋王之黨已成韋執誼以恩幸時時
召見問外事貞元十九年補闕張正買

疏諫他事得召見與正買相善者數人
皆往賀之王叔文韋執誼疑其言已朋
黨事誣以朋讎盡譴斥之意公之出有
類此也故公寄三學士詩云前日遇恩
赦私心喜還憂果然又羈執不得歸耒
耨蓋是時叔文之黨尚熾也又憶昨行
云伾文未揃崖州熾雖得赦宥常愁猜
是其爲王叔文等所排豈不明甚特無
所歸咎駕其罪於上疏耳洪謂公之被
絀坐論宮市與旱饑兩事兼而言之而

又不考韋王始末故爲申及之

又云商山季冬月冰凍絕行輒春風洞庭浪
出沒驚孤舟答張徹云疊雪走商嶺飛波航
洞庭蓋公以冬末貶官明年春始到陽山也
祭李郴州云當貞元之癸酉惕皇威而左授
當作癸未別知賦云歲癸未而遷逐是也公
在陽山有惠在民百姓多以公之姓命其子
是年有苗氏墓誌

二十年甲申

祭張署云余唱君和百篇在吟署有詩云九

疑峯畔二江前戀闕思鄉日抵年白簡趨朝
曾並命蒼梧左官亦聯翩鮫人遠泛漁舟火
鵬鳥閑飛霧裏天渙汗幾時流率土扁舟西
下共歸田公和詩即吟君詩罷看雙鬢陡覺
霜毛一半加者同冠峽詩云南方二月半春
物亦已少知公今春到陽山矣別知賦送楊
儀之云余取友於天下將歲行之兩周自建
中初避地江南至此二十餘年又有送楊八
弟支使歸湖南使府序即儀之也送區冊序
云愈待罪於斯且半歲矣有區生者自南海

拏舟而來與竇存亮誓云今乃乘不測之川
入無人之地以相從問文章爲事劉生詩云
陽山窮邑惟猿猴手持釣竿遠相投三子者
能從公于彼其志亦可尚矣祭署文云我落
陽山君飄臨武君止於縣我又南踰臨武屬
郴州在陽山之北憶昨云陽山鳥路出臨武
是也又云期宿界上一夕相語僕來告言虎
入廐處無敢驚逐以我驟去君云是物不駿
於乘虎取而往來寅其徵我預在此與君俱
膺猛獸果信惡禱而憑二公以今秋冬期宿

界上明年正月遇赦旣而俱徙掾江陵也公
在連州有王弘中燕喜亭記

韓文類譜卷第四

羅正弓西川少水珍
瓊山鮑依宋本校

韓文類譜卷第五

韓子年譜 起永貞元年止元和五年

丹陽洪興祖慶善

順宗 永貞元年乙酉移江陵法曹參軍 呂云二十

江陵掾以四門博士召非是

順宗實錄貞元二十一年正月丙申上即位
二月甲子大赦八月辛丑改永貞元年縣齋
有懷云嗣皇新繼明即此年也張署墓誌云
與同輩韓愈李方叔俱為縣令南方二年俱
徙掾江陵杏花詩云二年流竄出嶺外二年

謂甲申乙酉送文暢詩云三年竄荒嶺通癸
未歲也送區弘云我遷于南日周圍謂七年
春到陽山今春遇赦日一周天也河南同官
記曰永貞元年自陽山移江陵法曹蓋公今
春遇赦夏秋離陽山俟命於郴者三月其受
命在秋末也祭李郴州云俟新命於衡陽費
薪芻於館候輟行謀於俄頃見秋月之三
轂逮天書之下降猶低回以宿留郴在衡
山之南故曰衡陽自郴至衡有合江亭寄
刺史鄒君詩云維昔經營初邦君實王佐
注云此亭

故相齊公映作蓋映罷相後自夔移衡也窮秋
感平分新月憐半破時月未望也祭張署云
衡陽放酒熊咆虎嘯不存令章罰籌蝟毛委
舟湘流往觀南岳公有謁衡岳廟遂宿岳寺
題門樓詩云我來正逢秋雨節陰氣晦昧無
清風自衡至潭陪杜侍御遊湘西寺獨宿有
題云是時秋初殘暑氣尚未斂時月向晦矣
自此泛洞庭阻風贈張十一云十月陰氣盛
北風無時休即祭文云避風太湖七日鹿角
者旣至岳州別竇司直于岳陽樓云朝廻宜

春口宜春袁州夜纜巴陵洲巴陵岳州也竇
庠字胃卿時以武昌幕大理司直權知岳州
劉夢得賡韓侍御岳陽樓詩云假守亦高卧
墨曹正垂耳契闊話溫涼壺觴慰遷徙北史
裴訥之爲平原公墨曹掌書記通典云司法
參軍或謂之法曹或謂之墨曹又云故人南
臺舊一別如弦矢今朝會荆蠻斗酒相宴喜
劉與退之嘗同官此詩即夢得貶官過江陵
所作也 初公在郴時八月十五日夜贈張
功曹云昨者州前槌大鼓嗣皇繼聖登聖臯

赦書一日行萬里罪從大辟皆除徙遷者追
廻流者還滌瑕蕩垢清朝班州家申名使家
抑坎軻祇得移荆蠻是年八月憲宗受禪公
兩遇赦矣

按是年八月五日憲宗即位此十五日
詩也所謂嗣皇繼聖登夔臯及州家申
名使家抑只謂順宗赦也別本作者作
昨日然使家抑之言恐不緣再赦也

又赴江陵塗中有寄贈王二十補闕李十一
拾遺李二十六員外翰林三學士詩諱行錄

云王二十涯李十一建李二十六程也詩云
昨者京使至嗣皇傳冕旒赫然下明詔首罪
誅共兇謂貶王伾王叔文也永貞行云太皇
諒陰未出令謂順宗即位時嗣皇卓犖信英
主謂憲宗也又云郎官清要爲世稱荒郡迫
野嗟可矜時柳宗元自禮部貶外貶邵州刺
史劉禹錫自屯田貶外貶連州刺史柳再貶
永州司馬劉再貶朗州司馬皆坐交文叔也具
書目見非妄徵蓋公嘗謫陽山故也 送孟
瑄秀才序云今年秋見孟氏子於郴其十月

吾道於衡潭以之荆孟瑄元和五年進士見
鴈塔題名嘗著嶺南異物志荆潭唱和詩序
云僕射公開鎮荆蠻統郡惟九常侍楊公領
湖南之壤地二千里僕射裴均常侍楊憑也
憑以是年冬自湖南移江西裴均事見河南
同官記 十二月上李巽侍郎書云應舉覓
官二十年矣自貞元二年至今二十年又云
南行詩一卷即所謂百篇在吟者 五箴云
幕中之辨謂在徐州時臺中之評謂爲御史
時序云余生三十有八年即此年也一作四

十八按十八年與崔羣書云左車第二牙脫去兩鬢半白頭髮五分亦白其一祭老成云吾年未四十而視茫茫而髮蒼蒼而齒牙搖動自今年來蒼蒼者或化而爲白矣動搖者或脫而落矣此云髮之短者日益白齒之搖者日益落明年感春云冠欹感髮禿語誤悲齒墮以此觀之公未四十時屢有此歎知作四十八爲誤也 是年有鄭夫人殯表

憲宗

元和元年丙戌夏召爲國子博士

順宗實錄云永貞二年丙戌正月丙寅朔韓

本作正月丙戌朔誤矣是年正月改元和元年蓋憲宗即位之踰年也和張十一憶昨行云憶昨夾鍾之呂初吹灰杜公禮罷元侯廻杜佑貞元十九年春自淮南節度入朝拜檢校司空也

杜公古本作社公公時任江陵法曹元侯謂帥裴均也言裴均罷社而享客故其下謂車載牲牢甕舁酒並召賓客延鄒枚其義甚明洪誤矣

仵文未揃崖州熾憲宗即位始貶韋執誼爲

崖州司戶故也有李花云祗今四十已如此
時年三十九寒食出游夜歸贈張十一云念
君又署南荒吏署墓誌云徙掾江陵半歲邕
管奏君爲判官不行又云明宵固欲相就醉
有月莫愁當火令時春末夏初也

此寒食詩也謂禁火也魏武帝有寒食
禁火明罰令非謂夏初也東坡嘗爲李
公擇書此詩又作有月莫辭燈火冷不
知當時所據何本也

鄭羣贈簞唐本注羣時以殿中侍御史佐江

陵軍 釋言云元年六月自江陵召拜國子
博士請復國子監生徒狀云今聖道大明儒
風復振當在此年

狀當從歷官記以附長慶元年

荅張徹云赦行五百里月變三十冀漸階羣
振鷺入學誨螟蛉自十九年冬謫陽山至今
夏召還積三十月矣豐陵行是年七月葬順
宗于豐陵游青龍寺贈崔大羣補闕云秋灰
初吹季月管是年九月也贈崔立之評事云
復聞王師西討蜀霜風冽冽摧朝菌伐劉闢

在今春平蜀在今秋故征蜀聯句曰始去杏
飛蜂及來柳嘶蜚秋雨聯句亦云因思征蜀
士未免濕戎旆也城南聯句云驅明出庠黌
會合云天居覲清拱納涼云今來沐新恩同
宿云生榮今分踰諸聯句皆還朝後作 送
文暢北遊云昔在四門館晨有僧來謁謂貞
元十九年爲四門博士時昨來得京官謂今
年被召照壁喜見蜎甚言北歸之樂也僕射
領北門謂田季安相公鎮幽都謂劉濟是
年有祭十二兄岌文并墓誌

二年丁亥分教東都生

元和聖德詩序云外斬楊惠琳劉闢以收夏
蜀東定青徐積年之叛郊天告廟神靈歡喜
謂元年楊惠琳據夏州叛三月辛巳夏州兵
馬使張承金斬惠琳傳首以獻九月辛亥高
崇文奏收成都擒劉闢以獻十月壬午淄青
李師道十一月戊申武寧張愔皆受命二年
正月己丑朔上親獻太清宮太廟辛卯祀昊
天上帝于郊丘是日還宮御丹鳳樓大赦天
下先是將及大禮陰晦浹辰享獻之辰景物

晴霽人情忻悅序列二年事詩云正月元日
謂此年是也 四門博士周況妻韓氏墓誌
云開封尉俞之女開封卒從父弟愈於時爲
博士乞分教東都生以收其孥於開封界中
教畜之李翱云權知國子博士宰相有愛公
文者將以文學職處公有爭先者爲飛語公
恐及難遂求分司東都釋言云拜國子博士
始進見今相國鄭公後數日有來謂愈有讒
子於相國者旣累月又有來謂愈曰有讒子
於翰林舍人李公與裴公者旣累月上命李

公相客謂愈曰子前被言於一相今李公又相子其危矣公分教東都生正以避謗爾元年相國鄭餘慶鄭絪公爲國子博士在去年六月時餘慶已罷相又云吾見子某詩吾時在翰林職親而地禁不敢相聞鄭絪德宗時爲翰林學士累遷中書舍人憲宗即位爲中書侍郎同平章事公所見鄭公即絪也去年十二月李吉甫裴垍皆爲翰林學士中書舍人李即吉甫裴即垍也今年正月己酉吉甫爲中書侍郎同平章事李公又相即吉甫也

公初被召見鄭公後數日即有讒公者既累月又讒於裴李既累月李公又相釋言之作在今春矣分司東都在今年但不知何月耳公與馮宿書曰僕在京城一年又是歲之秋已有酬裴十六巡府西驛途中見寄詩是秋日已在東都矣疑只夏末出京也

是年有盧東美苗蕃盧於陵墓誌

三年戊子

酬崔十六少府詩唐本注云元和三年詩云

三年國子師公自元年爲博士至今三年行
狀云權知三年改真博士也東都遇春云幸
蒙東都官獲離機與穽謂避謗分司也與
少室山人李渤拾遺書云十二月某日伏承天
恩詔河南敦諭拾遺公方今天子仁聖自即
大位以來於今四年憲宗永貞元年即位至
今四年也唐史紀傳皆云元和元年詔以左
拾遺召不赴寄玉川子詩云少室山人索價
高兩以諫官徵不起則元年三年皆被徵公
遺以書渤善其言乃出家東都至九年始應

著作之命也新史云洛陽令韓愈遺渤海書公
是時爲博士五年方爲河南令未嘗爲洛陽
令也

四年己丑改都官員外郎守東都省

李翱來南錄云元和三年十月受嶺南尚書
公之命四年正月去東都韓退之石濬川假
舟送予到景雲山居詰朝登上方南望高山
題名姓紀別送翱詩云廣州萬里途山重江
逶迤時楊於陵節度嶺南辟翱爲幕府也又
云雖云有追送足迹絕自茲謂送至景雲山

居而別也 歐公云退之題名二皆在洛陽
其一在嵩山天封宮其一在福先寺塔下嵩
山題名云四年三月二十六日與著作佐郎
樊宗師處士盧仝自洛中至少室謁李徵君
渤樊次玉泉寺疾作歸明日遂與李盧道士
韋濛僧榮並少室而東抵衆寺上太室中峯
宿封禪壇下石室遂自龍泉寺釣龍潭水遇
雷明日觀啓母石入此觀與道士趙玄遇乃
歸閏月三日國子博士韓愈題

福先塔下題名乃去歲之十月十九日

時同遊者七人然非公親題也公今年九月復嘗與同僚迂杜兼于郊亦有題名時公已爲都官郎矣題名云河南尹水陸運使杜兼尚書都官貲外郎韓愈水陸運判官洛陽縣尉李宗閔水陸運判官伊闕縣尉牛僧孺前同州韓城縣尉鄭伯義元和四年九月二十三日大尹給事奉詔祠濟瀆回愈與二判官於此迎候遂陪遊宿愈題公題名今之可見於世者三題名之外又有從晉公東

征華岳題名洛北惠林寺釣魚題名同
李翱孟郊柳宗元石弘登慈恩塔題名
同樊宗師盧仝謁少室李拾遺題名皆
可參究聊併及之

祭薛公達云四年己丑後三月二十一日丙
寅朝散郎守國子博士韓某而墓誌云朝議
郎墓誌在祭文後也皇甫湜云除尚書都
官郎中分司判祠部新舊史行狀皆云都官
員外郎送李正字序云以都官郎守東都省
是也中官號功德使司京城觀寺尚書斂手

失職愈按六典盡索之以歸日與官者爲敵
公除都官六月十日也時實以貲外郎
分司東都神道碑謂郎中誤矣初除制
辭云朝議郎守國子博士分司東都上
騎都尉韓愈直亮而廉潔博達而沈厚
守經嗜學遂探其奧希古爲文故得其
精美宋玉之微辭尚楊雄之奇字爲己
求道暗然揚聲可行尚書都官貲外郎
分司東都王仲舒詞也

送侯叅謀赴河中幕云幸同學省官末路再

得朋侯繼同年進士時爲太學助教同在東
都見祭薛助教文又云洸洸司徒公天子爪
與肱三年九月王鐸爲檢校司徒河中節度
使司徒公即鐸也河北兵始進蔡州帥新薨
謂今年十月討王承宗十一月蔡州吳少誠
死明年感春云王師北討何當迴蔡州納節
舊將死謂此也 和虞部盧四汀酬翰林錢
七徽赤藤杖歌唐本云元和四年分司郎官
錢徽字蔚章盧汀字雲夫 是年有裴稷京
兆韋氏夫人墓誌河南府同官記

公有裴復墓誌非稷也復父虬嘗爲道
州刺史有怡亭銘歐公集古錄云退之
嘗爲其子復墓誌者此也復亦卒葬於
三年非四年也

五年庚寅爲河南縣令

感春詩云起居諫議聯翩來謂裴度自河南
功曹遷起居舍人孟簡等爲諫議大夫也又
云前隨杜尹拜表回笑言溢口何歡咍孔丞
別我適臨汝風骨峭峭遺塵埃音容不接祇
隔夜凶訃詎可相尋來杜兼爲河南尹四年

十一月暴薨孔戣爲衛尉丞分司東都五年
正月將浴臨汝之湯泉壬子至其縣食遂卒
見二人墓誌

裴度自河南府功曹從武元衡辟爲西
川節度掌書記自掌書記召入爲起居
郎洪謂自河南功曹遷誤也

上留守鄭餘慶啓云分司郎官職事唯祠部
爲煩且重愈獨判二年乞與諸郎官更判公
去年分司今二年矣 送鄭十涵校理序涵
餘慶之子改名澣貞元十三年進士憲宗所

謂卿之令子朕之直臣也序云愈爲博士也
始事相公於祭酒分教東都生也事相公於
東太學今爲郎於都官也又事相公居守三
爲屬吏經時五年按唐書宰相表永貞元年
八月尚書左丞鄭餘慶同平章事元和元年
十一月罷爲河南尹本傳云憲宗立拜平章
事未幾罷爲太子賓客改國子祭酒累遷吏
部尚書舊史云元年五月爲太子賓客九月
爲國子祭酒十一月爲河南尹河南志云二
年三月加兼知東都國子監事舊史又云三

年六月爲東都留守十月爲吏部尚書表不載其爲賓客祭酒傳不載其爲河南尹東都留守皆闕文也公以元年爲博士二年分教東都生四年分司郎官迨今五年矣送李判官正字礎歸湖南序礎貞元十九年進士仁鈞之子也序云貞元中愈從太傅隴西公平汴州李生之尊父以侍御史管汴之鹽鐵公薨軍亂軍司馬從事皆死侍御亦被讒爲民日南其後五年愈又貶陽山令今愈以都官郎守東都省侍御自衡州刺史爲親王府

長史亦留此掌其府事。李生自湖南從事請告來覲於時太傅府之士惟愈與河南司錄周君巢獨存。其外則李氏父子離十三年幸而集處。按汴州亂在貞元十五年。其後五年當貞元癸未。公貶陽山也。侍御之遷日南在董晉死後。自貞元己卯至今十二年而云。三十年豈退之與礎別在戊寅歲乎。周君巢貞元十一年進士。柳子厚有與君巢書。五竇聯珠云洛陽令竇牟陪韓院長韋河南同尋劉尊師不遇得同字曰仙客誠難訪吾人豈

易同獨遊應駐景相顧且吟風藥畹瓊枝秀
齋軒粉壁空不題三五字何以達壺公都官
貞外郎韓愈得尋字秦客何年駐仙源此地
深還隨躡鳬騎來訪馭風襟院閉青霞入松
高老鶴尋猶疑隱形坐敢起竊桃心河南縣
令韋執中得師字早尚逍遙境常懷汗漫期
星郎同訪道羽客杳何之物外求仙侶人間
得我師不知爛柯者何處看圍棊公詩集中
不載是詩以同尋師爲韻亦古人分韻之例
也竇牟墓誌云元和五年真拜尚書虞部郎

中轉洛陽令祭文云分宰河洛愧立並躬尋
劉尊師時竇爲洛陽令公爲郎官其後乃分
宰河洛也 爲河南令上留守鄭公啓云今
雖蒙沙汰爲縣猶在相公治下又云守官去
官惟今日指揮則公以論事失鄭公意旣令
河南猶論列不已行狀云改河南令日以職
分辨於留守及尹故軍士莫敢犯禁 燕河
南秀才云元和五年冬房公尹東京房式四
年十二月爲河南尹洛陽在唐爲東都故有
留守有尹留守之官居禁省中歲時出旌旗

叙留司文武百官於宮城門外而衙之見河
南府同官記又云昨聞詔書下權公作邦楨
是年秋德輿拜相也 月蝕詩効玉川作玉
川云新天子即位五年公云元和庚寅斗插
子即今年十一月也新史云全作此詩以譏
切元和逆黨按憲宗之崩在十五年新史誤
矣

江子我云元和五年時杜佑裴均李藩
權德輿爲平章事其他在朝類多賢俊
獨假宦官權太盛又往往出於閩嶺玉

川詩云才從海窟來便解綠青眞蓋尊
譏刺官官也按玉川此詩固不爲無意
史臣只合以譏刺官者言之必預指之
爲元和逆黨所以不免後世之議

是年有張圓墓碣盧殷墓誌 公在河南有
招楊之果及河南令舍池臺詩

志道云有軍人有罪愈追而問之不時至
怒杖之軍吏入告留守留守不察愈上書
決去就當是神策軍

韓文類譜卷第五

韓文類譜卷第六

韓子年譜

起元和六年止十三年

丹陽洪興祖慶善

六年辛卯行尚書職方員外郎

正月晦作送窮文吾與子居四十年餘時年四十四太學四年朝齋暮鹽謂元年至四年也辛卯年雪云元和六年春寒氣不肯歸河南二月末雪花一尺圍即樂天詩云元和歲在卯六年春二月月晦寒食天天陰夜飛雪者然退之以爲豐年之祥而樂天云信美

非時節蓋雪在臘中則爲瑞入春則多爲災
沴故耳 寄盧仝云水北山人得名聲去年
去作幕下士水南山人又繼往鞍馬僕從塞
間里公有送石洪溫造序唐本云送石在五
年送溫在今年送溫序云洛之北涯曰石生
其南涯曰溫生烏公鎮河陽之三月以石生
爲才致之幕下未數月以溫生爲才又致之
按唐書元和五年夏烏重胤爲河陽三城懷
州節度使烏公即重胤也送石序云方今寇
聚於恒師環其疆詩云鉅鹿師欲老恒山險

猶恃四年冬討王承宗五年七月赦之石生
赴河陽時兵猶在河北序又云使先生無圖
利於大夫而私便其身譏之也歐公云洪始
終無可稱而名重一時以嘗爲退之稱道耳

按公烏氏廟碑云元和五年四月中貴
人誘盧從史縛之壬辰詔用烏公爲河
陽節度使以許孟容神道碑考之壬辰
四月二十三日也蓋辟石洪在六月故
曰鎮河陽之三月此時未赦承宗故曰
恒山險猶恃也然送石與溫二序疑只

當附之五年公寄盧仝詩蓋今年之春
其曰水南山人又繼往只去年事也又
送溫序云未數月也以溫生爲才以石
生爲媒又羅而致之以未數月之言考
之恐不應在今年也或辟命在去冬而
春首行然實無所考也

乳母誌云見其所乳兒愈舉進士第歷佐汴
徐二州入朝爲御史國子博士尚書都官員
外郎河南令元和六年二月卒時尚在河南
也酬盧雲夫望秋作云長安兩洗新秋出時

已在京師 小說傳載云李素代杜兼爲河南尹時韓吏部由河南令轉職方歸朝或問前後之政曰將兼來比素蓋取古詩云新人工織縑故人工織素以縑持比素新人不如故也李素墓誌云拜河南少尹行大尹事呂氏子早弃其妻著道士衣冠謝母曰當學仙王屋山公使吏卒給冠帶送付其母公有詩云非癡非狂誰氏子謂早也 九月有復讎狀時爲朝議郎行尚書職方員外郎上騎都尉舊史云梁悅爲父復仇殺秦杲特勅免死

愈獻議執奏之議云殺之與赦不可一例宜
定其制曰凡有復父讎者尚書省集議奏聞
酌其宜而處之非執奏也 襄陽盧丞墓誌
云將以今年十月啓葬盧丞行簡之父爲襄
陽丞宰相表作襄陽令誤矣 石鼓歌云憶
昔初蒙博士徵其年始改稱元和又曰六年
西顧空吟哦當在今年 是年有房武畢垆
墓誌

七年壬辰春復爲國子博士

憲宗實錄云七年二月乙未職方員外郎韓

愈爲國子博士舊史云華州刺史閻濟美以公事停華陰令柳澗縣務居數月濟美罷郡澗諷百姓遮道索前年軍頓役直後刺史趙昌至按得澗罪以聞貶房州司馬時愈因使過華以爲刺史相黨上疏理澗詔遣監察御史李宗奭按得澗贓狀再貶封溪尉以愈妄論復爲國子博士柳澗建中四年進士也公自去年以來未嘗出使或云即公赴職方時過華覩其事遂疏于朝爾進學解云三年博士冗不見治舊史作三爲博士按公貞元

壬午授四門博士元和丙戌爲國子博士丁亥分教東都生今年又自郎官下遷凡四爲博士矣此先言暫爲御史繼言三爲博士則自丙戌而後三歷此官也若云三年則自元年夏赴召至四年春尚爲博士首尾四年矣玉川子有常州孟諫議座上聞韓員外貶國子五首云國學大頻頻謂此也孟諫議簡也以直言出刺常州是年二月有論錢重物輕狀蓋自建中定兩稅而物輕錢重民以爲患也

丙戌爲博士丁亥分教東都生不可釐而爲二舊史及古本皆作三爲博士蓋後人以二爲字相比遂易其一也又唐書食貨志穆宗即位兩稅外加率一錢者以枉法賦論蓋自建中定兩稅而物輕錢重民以爲患至是四十年當時絹二疋者爲八疋大率加三倍豪家大商積錢以逐輕重故農夫日困末業日增帝亦以貨輕錢重民困而用不充詔百官議改其弊是歲長慶元年也資治通

鑑載楊於陵議亦在元年之冬洪載錢
重物輕狀於今年且以爲二月不知何
所本也

十二月有石鼎聯句詩或云皆退之所作如
毛穎傳以文滑稽耳軒轅寓公姓彌明寓公
名侯喜師服皆其弟子也余曰不然公與諸
子朝戲見於詩者多矣皇甫湜不能詩則曰
掎撫糞壤間孟郊思苦則曰腸肚鎮煎燭焚
宗師語澁則曰辭慳義卓闊止於是矣不應
譏誚靳薄之如是甚也且序云衡山道士軒

轅彌明貌極醜白髮黑面長頸而高結喉中
又作楚語年九十餘此豈亦退之自謂邪予
同年李道立云嘗見唐人所作賈島碣云石
鼎聯句所稱軒轅彌明即君也島范陽人彌
明衡山人島本浮圖而彌明道士附會之妄
無可信者獨仙傳拾遺有彌明傳雖祖述退
之之語亦必有是人矣 贈劉師服云祗今
年纔四十五唐本云元和六年又云巨緡東
釣儻可期與子共飽鯨魚膾舊史云十二年
駙馬都尉于季友居喪與進士劉師服夜飲

師服流連州公亦以十四年貶潮陽與東坡
遂從此而入海之讖同也公送師服詩云低
頭受侮笑隱忍磔元寃齎財入市賣貴者常
難售而師服乃以酒食之故得罪竄逐與蘇
子美坐會客除名之事同也

公元和七年年四十五唐本作六年誤
矣蓋師服以七年來京師十二月有石
鼎聯句而二送詩則皆來年夏也故曰
夏槐作雲屯又曰夏半陰氣始是也公
贈師服詩稱其勇氣直言師服與軒轅

彌明爲知友而坐于季友之飲以敗亦
可想見其爲人也

劉夢得寄楊八拾遺曰爲謝同寮老博士范
雲來歲即公卿楊八名歸厚是年十二月自
拾遺貶國子主簿分司見舊史同寮老博士
謂退之也梁范雲由國子博士爲黃門侍郎
其謝表云去歲冬初國子老博士爾 是年
有李素石洪墓誌路應神道碑祭石三學士
洪文

八年癸巳春守尚書比部郎中史館修撰

實錄云八年三月乙亥國子博士韓愈比部郎中史館修撰新史云愈數黜官又下遷乃作進學解以自喻執政覽之竒其才舊史云執政覽其文而憐之以其有史才改比部郎中史館修撰然則執政憐其數黜且以有史才故除是官非止竒其能文而遷擢之也新史務簡遂失其實時宰相武元衡李吉甫李絳也公除官制曰太學博士韓愈學術精博文力雄健立詞措意有班馬之風求之一時甚不易得加以性方道直介然有守不交勢

利自致名望可使執簡列爲史官記事書法
必無所苟仍遷郎位用示褒升白居易詞也
荅魏博田弘正書云奉十一月示問令譔廟
碑碑云元和八年則此書在今冬也

按公奉詔爲田弘正廟碑實元和八年
十一月也然此書云季冬極寒又云蒙
恩改職蓋公以九年十二月十五日遷
考功郎中知制誥此書其年歲暮作也
所謂十一月十二日示問者亦九年十
一月也而云頃者蒙不以文字鄙薄令

撰廟碑者蓋記八年事也書辭甚明又
李吉甫傳載田弘正以元和九年拜檢
校尚書右僕射此書所以稱僕射者此
也洪不詳考耳

是年有烏氏廟碑鄭僭神道碑李虛中董溪
息國夫人墓誌

志道云公入館不修史或貽書勸其筆削
愈答云自古爲史者不有人責必有天災
柳子厚聞而非之以書箴其失

九年甲午冬爲考功郎中知制誥

實錄云九年十月甲子韓愈考功郎中依前
史館修撰十二月戊午以考功知制誥舊史
云比部踰歲轉考功自去春至今豈特踰歲
也 公在史館有荅劉秀才元微之書荅劉
書以六月九日抑宗元與公論史書以正月
二十一日宗元云前獲書言史事云具與劉
秀才書及今乃見書藁知公荅劉在去年六
月宗元書在今年正月也子厚呼退之十八
丈者韓公兄弟皆其父執見子厚先友記按
子厚平時稱退之不曰韓愈則曰韓生文人

相輕自古皆然然退之道子厚不容口以此
見二公之爲人也與微之書云濟逢父子自
吾人發唐史云甄濟不污祿山拜太子舍人
來瑱辟爲陝西襄陽叅謀拜禮部員外郎宜
城楚昭王廟壩地廣九十畝濟立墅其左子
逢耕宜城墅自力讀書以父名不見史欲詣
京師自言元和中荆南節度袁滋表濟節行
有詔贈秘書少監即公所云追爵其父第四
品者甄氏居宜城見宜城驛記 送張道士
序云九年聞朝廷將治東方諸侯貢賦之不

如法者謂吳元濟也 是年有劉昌裔神道
碑王適孟郊扶風郡夫人墓誌

十年乙未

呂云是年拜
中書舍人

和庫部盧四兄曹長元日朝廻及寒食直歸
遇雨二詩唐本云元和十年公知制誥寓直
禁掖故詩云風光連日直陰雨半朝歸 與
李華州書云獨宿直舍無可告語也華州李
尚書即李絳也絳以元和六年冬同平章事
九年春罷爲禮部尚書十年春檢校戶部尚
書出爲華州刺史潼關防禦鎮國軍等使書

云乍離闕庭伏計倍增戀慕當在今年又云
愈於久故游從之中蒙恩獎知待最深最厚
公與絳同年進士絳爲相擢公太史又云愚
以爲苟慮有所及宜密以上聞不宜以疎外
自待本傳云州有捕鵠戶歲責貢限絳以爲
言并勸止田獵入爲兵部尚書今本以爲李
實誤矣進順宗實錄狀云去八年十一月
臣在史職監修李吉甫授臣以前史官尋處
厚所撰先帝實錄三卷令臣重修吉甫慎重
其事欲更研討比及身歿尚未加功臣於吉

甫宅取得舊本自冬及夏刊正方畢按吉甫九年十月卒則進實錄在此年夏也舊史云愈撰實錄繁簡不當叙事拙於取舍按退之作史詳略各有意削去常事著其繫於政者其褒善貶惡之旨明甚當時議者非之卒竄定無全篇良可惜也史又云愈說禁中事頗切直內官惡之往往於上前言其不實此言是也 公與鄂州柳公綽中丞二書云計已與裴中丞相見行營事宜不惜時賜示及當在今年公綽以鄂岳兵五千隸安州刺史李

聽率赴行營公綽曰朝廷以吾儒生不知兵邪即日上奏願行許之抵安州選卒六千屬聽戒其部校曰行營之事一決都將聽感恩畏威如出麾下鄂軍旣在行營公綽時令省問其家疾病養生送死必厚廩之故鄂人戰每剋捷資治通鑑云九年閏八月少陽卒其子元濟自領軍務十年春縱兵侵掠及於東畿命宣武等十六道兵進討其後師久未有功五月上遣中丞裴度詣行營察用兵形勢度進言淮西必可取之狀考功郎中知制誥

韓愈上言淮西三州之地自少陽疾病去年
春夏已來圖爲今日之事又云以三小州殘
弊困劇之餘而當天下之全力其破敗可立
而待所未可知者在陛下斷與不斷耳此狀
在裴度察形勢之後三州申光蔡也又云少
陽之歿朕亦本擬與元濟今本作少誠誤矣
洪載淮西便宜狀已經辨正然公行狀
載之甚明固不必考之通鑑也但通鑑
附見裴度察形勢西歸之日併載之五
月以行狀考之公論實在捕賊行賞後

也察其事勢亦當然也洪譜附於六月之前姑從通鑑耳而實非也墓誌與新傳又併繫於遷中書舍人之後而樊從之蓋又差一年也

六月有論捕賊行賞表舊史云十年六月鎮州節度王承宗遣盜刺宰相武元衡又刺裴度傷首而免詔京城諸道能捕賊者賞錢萬貫仍與五品官乃積錢貳萬貫於東西市京城大索神策將士王士則王士平以盜名上言且言承宗所使乃捕得張晏等八人誅之

藍田縣丞廳記唐本云元和十年 是年有
獨孤郁衛之玄墓誌徐偃王碑

衛府君墓誌今本皆作衛之玄故洪從
之閣本舊本只作君諱某字某葬某處
其所蓋公誌初成本文也及質之善本
則君諱某者實中立也非之玄也衛晏
三子長之玄字造微次中立字退之末
中行字大受中行於時爲兵部郎中爲
中立乞銘於公者墓誌首云兄弟三人
後只云與中行別則其爲中立誌無疑

矣中立餌奇藥求不死而卒死故白樂
天詩謂退之服硫黃一病訖不痊乃中
立也孔毅夫陳無已之徒皆指以爲公
晚年惑金石藥獨近世李季可謂公長
慶三年作李公墓誌力詆六七公皆以
藥敗明年則公卒豈咫尺之間身試其
禍哉或前人文字之同或傳寫之繆使
賢者蒙汚然實無所考證也按公屬續
之言謂愈踈愚食不擇禁忌位爲侍郎
年出伯兄十五歲且獲終牖下如又不

足於何而足是公豈服藥以求長年者
况白氏所紀退之微之杜子崔君三四
公蓋非皆有聞於時者適以中立字之
偶同遂歸過於公千載之誣庶自茲一
洗故敢併及之

十一年丙申春遷中書舍人夏爲太子右庶子
實錄云十一年正月丙戌考功郎中知制誥
韓愈中書舍人丙申賜服緋魚 周况妻韓
氏墓誌云開封卒愈時爲博士乞分教東都
生以收其孥於開封界中教畜之而歸其長

女于周氏况韓氏嫁九年而死其從父愈於
時爲中書舍人公分教東都生在二年至今
十年云嫁九年而死則二年分教東都生三
年嫁韓氏于周况也公有詩寄周郎博士即
况也 實錄又云五月癸未降爲太子右庶
子本傳云初憲宗將平蔡命裴度視賊及還
言賊可滅與宰相議不合時宰相李逢吉韋
貫之也愈亦奏言云云執政不喜俄有不悅
愈者撫其舊事坐是改右庶子李翱云唯公
以爲盜殺宰相而遽息兵其爲懦甚大兵不

可以息故兵遂用而宰相有不便之者月滿
遷中書舍人後竟以它事改右庶子其云月
滿遷中書舍人者按裴度自司勳郎中知制
誥爲中書舍人白居易行制云臺郎滿歲班
列當遷綸閣之職所宜眞授 公九年冬以
考功知制誥至今春竟一歲矣李漢云收拾
遺文無所失隊公掌綸誥一年無一篇見收
者失隊多矣唯後集有崔羣戶部侍郎制一
首云比參密命弘益旣多及貳儀曹升擢惟
允舊史云羣元和初爲翰林學士以謹言正

論聞於時遷禮部侍郎選拔才行咸爲公當
轉戶部新史不載其爲禮部闕文也 酬盧
給事雲夫曲江荷花呈錢七兄閣老錢徽元
和初爲翰林學士九年爲中書舍人十一年
罷爲右庶子詩云豈如散仙鞭笞羈鳳終日
相追陪時公與徽同爲庶子也 王用碑云
京兆尹李修當作脩脩是年十月爲浙西觀
察使 科斗書後記云衛宏官書即舊唐志
所云衛宏詔定古文官書新史作字書誤也
歸公歸登也有文學工草隸見舊史

十二年丁酉秋爲彰義行軍司馬冬爲刑部侍郎

公前此嘗薦殷侑堪任御史太常博士今年侑自太常博士遷虞部員外郎兼侍御史使回鶻時回鶻請昏有司度費五百萬朝廷方用兵淮西乃遣宗正少卿李孝誠及侑往諭不可新史以爲元和八年又云侑還遷虞部員外皆誤矣薦侑狀云兼通三傳傍習諸經荅殷侍御書云新注公羊春秋疑即侑也一本以爲殷銜誤矣送侑序張署墓誌皆爲庶

子時作至祭署時已爲司馬云銘君之績納石壤下蓋祭文在墓誌後也 唐史云十二年七月丙辰太子右庶子韓愈兼御史中丞充彰義軍行軍司馬公和晉公詩云長慙典午非材識是也愈請乘遽先入汴說韓弘使叶力即祭署云丞相南討余辱司馬議兵大梁走出洛下者時裴度拜門下侍郎平章事彰義軍節度淮西宣慰招討處置使度表刑部侍郎馬摠爲副愈爲行軍司馬司勲員外郎李正封都官員外郎馮宿禮部員外郎李

宗閔兼侍御史節度觀察判官掌書記以郾城爲蔡州治所八月三日庚申度赴行營天子御通化門勞遣之八月二十七日甲申至郾城十月十七日癸酉平蔡自受命東伐至平蔡凡七十餘日李勣云十二年秋賊未滅丞相請公以行賜三品衣魚公知蔡州精卒聚界上以拒官軍守者率老弱且不過千人亟白丞相請以兵三千人間道入必擒元濟丞相未及行李勣自唐州文城壘以夜入蔡州果得元濟平淮西碑云十月壬申勣用所

得賊將自文城因天大雪疾馳百二十里用
夜半到蔡破其門取元濟以獻壬申十六日
也段文昌云十月旣望朔遣其將一夕卷旆
凌晨破關然則入蔡十六日平蔡十七日也
舊史云己卯入蔡又裴度吳元濟傳皆曰十
日朔夜至蔡十一日擒元濟皆誤矣十二月
壬戌度進金紫光祿大夫上柱國晉國公馬
摠檢校工部尚書彰義軍節度丙子愈爲刑
部侍郎公東征賦詩有云李二十八即正封
馮十七即宿也晚秋鄆城夜會李正封聯句

上王中丞盧院長按舊本從軍古云樂四句
下注云正封上中丞退之時兼御史中丞也
羈客方寂歷下四句注云愈奉院長院長即
正封也其稱王盧繆矣詩云此年名作噩爾
雅太歲在酉曰作噩也公爲刑部有舉錢徽
自代狀

志道云蔡平處士栢耆以計謁愈愈白度
使奉書諭王承宗承宗惶恐割二州以獻
十三年戊戌

從晉公野宿西界詩云自趁新年賀太平公

還朝在春首也

按舊史裴度以去年十二月十六日至
自蔡公無緣踰歲方還朝也洪誤矣

進平淮西表云奉正月十四日勅牒一本表
後云三月二十五日自奉勅至進碑凡七十
日矣舊史云淮西碑多叙裴度事時先入蔡
州李愬功第一愬不平之詔令磨愈文命翰
林學士段文昌重撰文勒石故李義山詩云
帝曰汝度功第一汝從事愈宜爲辭句奇語
重喻者少讒之天子言其私長繩百尺拽碑

倒麓沙大石相磨治東坡嘗於邸舍壁間見
一詩云淮西功德冠吾唐吏部文章日月光
千載斷碑人膾炙不知世有段文昌或曰此
詩東坡作蓋東坡嘗作上清宮記蔡元度磨
之別自書撰故云耳 實錄云十三年夏四
月鄭餘慶爲詳定禮儀使奏韓愈李程爲副
是年有李惟簡墓誌胡珣權德輿碑

胡珣碑云爲書使人自京師南走八千
里至閩南兩越之界上請爲公銘刻之
墓碑於潮州刺史韓愈則十四年作也

不知洪何以附之今年

韓文類譜卷第六

韓文類譜卷第七

韓子年譜

起元和十四年
止長慶四年

丹陽洪興祖慶善

十四年己亥春貶潮州刺史冬移袁州

元日酬蔡州馬尚書去年蔡州元日見寄之
什云元日新詩已去年當在今春也 舊史
云鳳翔法門寺有釋迦指骨一節是年正月
丁亥上令中使押宮人持香花迎佛骨留禁
中三日乃送諸寺王公士庶奔走捨施唯恐
在後百姓有廢業破產燒頂灼臂而求供養

者愈上疏極陳其弊癸巳貶潮州刺史宰相
疑馮宿草疏出宿爲歙州刺史時宰相皇甫
鑄程異也公之被謫即日上道便道取疾以
至海上初以二月二日過宜城見宜城驛記
三月二十五日至潮州謝上表云蒙恩除潮
州刺史即日奔馳上道經涉嶺海水陸萬里
以今月二十五日到州上訖 瀧吏詩云南
行逾六旬始下昌樂瀧又云下此三千里有
州始名潮公以正月十四日去國行逾六旬
三月幾望矣遂以二十五日至潮則是十許

日行三千里蓋瀧水湍急故也瀧音雙歐陽
文忠公云韶州圖經樂昌縣西一百八十里
武溪驚湍激石流數百里按武水源出郴州
臨武其俗謂水湍峻爲瀧劉仲章者前爲樂
昌令余初以韓集云昌樂瀧疑其誤乃改從
樂昌仲章云不然縣名樂昌而瀧名昌樂其
舊俗所傳如此韓集不誤也謝表又云年纔
五十時年五十二 四月十六日有送毛仙
翁序二十四日有祭鱷魚文 公初貶潮至
藍關有詩云雲橫秦嶺家何在次鄧州界有

詩云戀闕那堪又憶家蓋公乘驛之官與家人別於京師其後家亦譴逐及公於南方故過始興江口感懷云憶作兒童隨伯氏南來今祇一身存目前百口還相逐舊事無人可共論初公隨兄南遷于韶兄卒北歸與百口避地江南至今三十餘年往時百口獨公存耳公在潮州有謝孔大夫狀云伏奉七月二十七日牒以其貶授刺史特加優禮以州小俸薄慮有闕乏每月別給錢五十千以送使錢充者開緘捧讀驚榮交至顧已量分慚

懼益深欲致辭爲讓則乖伏屬之禮承命苟
貪又非循省之道進退反側無以自寧其妻
子男女并孤遺孫姪奴婢等尚未到官窮州
使賓罕至身衣口食綰米足充過此以往實
無所用積之於室非廉者所爲受之於官名
且不正恃蒙眷待輒此披陳此狀集中無之
孔幾十二年秋自國子祭酒拜御史大夫廣
州刺史嶺南節度孔大夫即幾也

按公過始興江口詩云目前百口還相
逐而此狀蓋八月間所作却云某妻子

男女并孤遺孫姪奴婢等尚未到官不知何以又女拏壙銘謂愈旣行有司以罪人家不可留京師迫遣之女拏道死於商南蓋二月二日也不應八月猶未至潮此狀不見本集不知洪何所本也潮州請置鄉校牒云趙德秀才即叙退之文章七十二篇爲文錄者公有別趙子詩德自謂行道學文庶幾乎古不肯從公于袁而區弘自連山從公于荆又從公于京師各從其志也 袁州謝表云先朝恕臣愚直不加大

罪自刑部侍郎貶潮州刺史伏遇其年七月
十三日恩赦至其年十月二十四日準例量
移改授袁州刺史是年七月己丑羣臣上尊
號曰元和聖文神武法天應道皇帝御宣政
樓受冊禮畢御丹鳳樓大赦天下己丑七月
十三日也實錄云十月己巳韓愈袁州刺史
己巳十月二十四日也 公在潮有賀冊尊
號表

十五年庚子秋召爲國子祭酒

是年閏正月穆宗即位袁州謝上表云臣以

去年正月貶授潮州刺史其年十月移授袁州以今月八日到任曲江留別張韶州云來往再逢梅柳春知公去春到潮今春到袁也是春有賀穆宗即位賀赦賀冊皇太后賀慶雲四表舉韓泰自代狀 滕王閣記云十五年十月袁州刺史祭湘君夫人云十五年十月朝散大夫守國子祭酒按唐史云九月辛酉袁州刺史韓愈國子祭酒蓋命下在九月受命在十月是月爲滕王閣記時猶未受祭酒之命也 祭湘君夫人云前歲之春黜守

潮陽去潮卽表今又獲位於朝凡三年於今
自十四年春至今年十月纔二年耳又云復
其章綬者公爲行軍司馬時賜金紫今爲祭
酒復其舊也

湘夫人祭文刻於黃陵廟碑陰今在湘
陰縣北八十里趙德父云碑四面皆有
字今其兩面字多處已磨滅不可讀德
父嘗得七八十年前本完好可寶今所
謂凡三年者實作凡三十年然趙德父
之疑亦如洪之疑也余按公文云退思

往昔實發夢寐凡三十年於今乃合公
蓋記疇昔之夢耳非謂自貶所歸朝也
其義甚明況於今亦不爲斷句余嘗疑
公以剛正自許而乃若眷眷於一黃陵
廟以私錢十萬新其廟宇又爲文以祭
之句石以銘之意其必有所感召今乃
得於祭文洪不細考耳樊本載石本又
作累年蓋字益磨滅從而意之耳

次石頭驛寄江西王十中丞閣老云憑高試
回首一望豫章城王仲舒自中書舍人除御

史中丞觀察江西公北歸寄詩別之 至江
州寄鄂岳李大夫云故人辭禮闈旌節鎮江
圻李程自禮部侍郎觀察鄂岳又云別來已
三歲蓋程十三年出鎮與公別於京師今三
歲矣又云年皆過半百時公年五十三又云
公其務貫過我亦請改事然則二公嘗以事
相失也 題西林寺故蕭二郎中舊堂注云
公有女爲尼在江州詩云中郎有女能傳業
伯道無兒可保家偶到匡山曾住處幾行衰
淚落烟霞一云今日匡山過舊隱空將衰淚

對烟霞因話錄云蕭穎士子存字伯誠爲金部員外郎惡裴延齡之爲人弃官歸廬山以山水自娛終于檢校倉部郎中公少時嘗受金部賞知及自袁州入爲祭酒途經江州因遊廬山過金部山居訪知諸子凋謝唯二女在焉因賦此詩留百鍊以拯之 行次安陸先寄隨州周員外云行行指漢東暫喜笑言同雨雪離江上蒹葭出夢中隨州一作循一作徐皆誤舊本蓋曰周隨州循循其名也夢中夢澤也

周貞外乃周君巢也諸本無有名循者
公再寄周詩云陸孟仁楊久作塵同時
存者更誰人金丹別後知傳得乞取刀
圭救病身公與君巢同爲董晉幕客陸
長源孟叔度仁穎楊凝皆一時同幕之
舊至是皆歿矣君巢晚留意丹藥柳子
厚嘗有荅周君巢論餌藥久壽書故公
有末章之語其爲周君巢無疑矣洪爲
或本所誤耳

南海神廟碑云元和十二年詔用魯國孔公

爲廣州刺史又云至荆之明年即十三年明
年紀歸即十四年明年其時公又固往即十
五年殄墓誌云祠部歲下廣州祭南海廟廟
入海口爲州者皆憚之不自奉事唯公歲自
常行官吏刻石爲詞美之十五年遷吏部侍
郎而舊史云殄每受詔自犯風波而往愈在
潮州作詩美之按十五年退之已移袁州舊
史誤也

公在潮州孔殄待公特厚舊史所謂作
詩美之蓋南海廟碑也碑云願刻廟石

以著厥美而繫之以詩故也碑立在元和十五年十月時公亦已去袁矣然公誌孔戣墓云官吏刻石爲詞美之是立碑之日公亦不應尚稱官吏也蓋墓誌與傳皆推本而言之也

與孟簡書云行官自南回過吉州得手書簡十五年春貶吉州司馬也又云潮州時有一老僧號大顛頗聰明識道理遠地無可與語者故自山召至州郭留數十日及祭神海上遂造其廬及來袁州留衣服爲別乃人之情

非崇信其法求福田利益也東坡云退之喜
大顛如喜文暢澄觀之意而世妄撰退之與
顛書其詞凡鄙有一士人又於其末題云歐
陽永叔謂此文非退之莫能及此又誣永叔
也近世所傳退之別傳載公與大顛往復之
語深詆退之其言多近世經義之說又於其
末作永叔跋云使退之復生不能自解免吾
友吳源明云徐君平見介甫不喜退之故作
此文耳

公與大顛手簡三刻石在潮州靈山院

慶曆中表世弼得其墨本疑之以質歐
公歐公云實退之語佗意不及也手簡
上二簡皆招速常語耳第三簡最後云
愈聞道無疑滯行止繫縛苟非所戀著
則山林閑寂與城隍無異大顛師論甚
宏博而必守山林不至州郭自激修行
立空曠無累之地者非通道也勞於一
來安于所識道故如是故歐公謂其以
繫辭爲大傳謂著山林與著城郭無異
謂宜爲退之言者此也近世妄撰公別

傳以爲孟簡所纂純載公與大顛荅問
佛法語故世儒與前簡併廢之然公上
三手簡固無它語也以孟簡書質之公
固嘗邀之至州郭也歐公跋語見於集
古錄豈洪亦未之考耶王介甫嘗有送
呂潮州詩云不必移鱷魚詭怪以疑民
有若大顛者高材能動人亦勿與爲禮
聽之汨彞倫故一時黨同者爲此傳源
明之言不妄也

論黃家賊事宜狀云去年貶嶺外刺史謂在

潮時黃家賊即柳子厚所稱邕管黃少卿等也論典貼良人家男女狀云臣往任袁州刺史此狀在還朝之後袁人以男女爲隸過期不贖則没入之愈至悉計傭得贖所沒歸之父母七百餘人又論夷獠請因改元大慶遣使宣諭仍擇經略使撫之是年有柳子厚姪孫滂祭文墓誌魯直云退之自潮州還朝後文不煩繩削而自合

志道云不知者傳愈稍信奉佛氏簡素事佛以書贊之愈荅書以辨

穆宗長慶元年辛丑秋遷兵部侍郎

公去冬之末道出漢東今春方至京師公有詩云竄逐三年海上歸自十四年謫潮至今春到闕首尾三年矣

按黃家賊事宜狀及典貼良人男女狀二狀皆云乞因改元大慶而行之是在未慶霈之前有此狀也故洪載二狀於去年冬而此却云今春方到闕何也按黃家賊事宜狀謂臣去年貶嶺外刺史又典貼良人男女狀謂臣往任袁州刺

史謂之去年蓋元和十四年也則是公十五年冬已到闕豈不明甚若謂令春到闕則不應預有此二狀也公長慶二年再見裴晉公於鎮州行營所謂竄逐三年海上歸逢公復此著征衣者蓋記相別之日兼竄逐而言也非必謂竄逐實經三年也况公初除祭酒實去歲九月二十二日亦不應一冬在道理無可疑

李翱云公入遷祭酒有直講能說禮而陋容

學官多豪族子擯之不得共食公命吏曰召直講來與祭酒共食學官由此不敢賤直講奏儒生爲學官日使會講生徒奔走聽聞皆相喜曰韓公來爲祭酒國子監不寂寞矣公在國子有舉張惟素自代狀論新注學官牒薦張籍狀請上尊號表云坐收冀部旋定幽都冀王承元幽劉總也張籍祭公詩云我官麟臺中公爲大司成念此委末秩不能力自揚特狀爲博士始獲升朝行時籍自校書郎爲國子博士公爲祭酒雨中寄籍詩云

歲晚偏蕭索誰當救晉饑籍荅云聞道韓夫子還同此寂寥公誘厲後進館之者十六七雖晨炊不給怡然不介意族姻友舊不自立者必待我然後衣食嫁娶喪葬而公自幼至老家人常百口宜其貧也唐史云秋七月庚申國子祭酒韓愈爲兵部侍郎公爲兵部有舉韋顥自代狀是年有李邦祭文墓誌鄭羣薛戎墓誌

志道云公牒吏部國子監學官非通經博涉及進士五經諸色登科人勿擬新官上

日必加研試然後教上

二年壬寅春奉使鎮州秋遷吏部侍郎

元年七月壬戌鎮州亂殺田弘正立王廷湊
命深州刺史牛元翼節度深冀以討之十月
丙寅命裴度爲鎮州四面行營都招討使戊
辰元翼爲廷湊所圍二年春二月甲子赦廷
湊詔愈宣撫衆皆危之愈旣至諭以逆順辭
情切至廷湊畏重之語在本傳李翱曰朝廷
以廷湊爲節度使詔公往宣撫歸而牛元翼
果出及還於上前奏與廷湊及三軍語上大

悅曰卿直向伊如此道由是有意大用授吏部侍郎公使鎮州次壽陽驛詩云風光欲動別長安春半邊城特地寒鎮州初歸詩云還有小園桃李在留花不發待郎歸公以二月初使鎮州二月望次壽陽驛比還春末矣壽陽太原之東邑也時裴度屯承天行營有酬裴司空詩云竄逐三年海上歸逢公復此著征衣蓋公嘗從度討蔡今復使廷湊也又鎮州路上酬裴重見寄詩云銜命山東撫亂師日馳三百自嫌遲公奉使往返纔兩月者以

此舊史云度受命之日蒐兵補卒自董西師
臨於賊境屢以捷聞進位檢校司空也開
州韋侍講盛山十二詩序云韋侯昔以考功
副郎守盛山處厚以元和十一年九月自考
功爲開州刺史也又云及此年韋侯爲中書
舍人侍講六經禁中處厚以元和十五年三
月壬子以侍講學士講詩關雎書洪範于太
液亭今年夏四月爲中書舍人也論變鹽
法事宜狀舊史云二年三月張平叔爲戶部
侍郎上疏請官自賣鹽可以富國強兵陳利

害十八條詔下其疏令公卿詳議中書舍人
韋處厚隨條詰難事遂不行司馬溫公云愈
時奉使鎮州未還狀云奉今月九日勅不知
其何月也今附於四月之末 穆宗實錄云
二年九月庚寅兵部侍郎韓愈爲吏部侍郎
公行狀云凡令史皆不鎖聽出入或問公公
曰人所畏鬼者以其不能見也鬼如可見則
人不畏矣選人不得見令史故令史勢重聽
其出入故勢輕 鄆州谿堂詩後曰長慶二
年十月建序曰憲宗十四年馬公爲節度觀

察使上即位之二年召公入穆宗以元和十五年即位即位之二年長慶元年也上之三年公爲政於鄆曹濮適四年矣正在今年是年有竇司業祭文墓誌楚國夫人墓誌黃陵廟碑

按趙德父金石錄黃陵廟碑實在長慶元年又碑云長慶元年刺史張愉自京師往余謂曰白我一碑石載二妃事愉旣至州曰碑謹具遂篆其事則固不應在二年也

三年癸卯夏爲京兆尹兼御史大夫冬復爲兵部侍郎又遷吏部侍郎

實錄云三年六月辛卯吏部侍郎韓愈京兆尹兼御史大夫勅放臺叅後不得爲例時宰相李逢吉與李紳不協及紳爲中丞乃除愈京兆尹兼御史大夫仍放臺叅紳性峭直屢上疏論其事遂與愈辭理往復逢吉乃兩罷之出紳爲江西觀察使以公爲兵部侍郎荅友人論京兆尹不臺叅書云容桂觀察使帶中丞尚不臺叅京尹郡國之首所管神州赤

縣官帶大夫豈得却不如事須臺叅亦是何典故赤令尚與中丞分道而行何況京尹聖恩以爲然便令宣與李紳不用臺叅今本顛倒不可讀當從唐本也 李翱云改京兆尹六軍將士皆不敢犯私相言曰是尚欲燒佛骨者安可忤故盜賊止遇旱米價不敢上實錄云十月癸巳愈爲兵部侍郎庚子爲吏部侍郎 公爲京兆有舉馬摠自代狀賀雨賀太陽不虧表祭竹林神曲江祭龍文 再爲兵部有舉張正甫自代狀 羅池廟碑云

尚書吏部侍郎韓愈撰長慶元年正月建按
長慶元年正月公尚爲祭酒二年九月始爲
吏部歐陽公云據建碑時公未爲吏部碑云
柳侯死後三年廟成明年愈爲柳人書羅池
事子厚以元和十四年卒至後二年愈作碑
時當是長慶三年其云元年蓋傳摹者誤刻
之耳 是年有送鄭權尚書序并詩祭馬摠
張徹女孥文并女孥墓誌韓弘碑李干墓誌
論孔戣致仕狀

按公祭馬摠文時爲吏部侍郎也公尹

京兆自吏部遷嘗舉揔自代是舉代之
日揔固亡恙不應祭文具前階也然祭
文實云賀問未歸吊廬已萃未燕于堂
已哭于次蓋揔方詔歸而遽卒時公除
京兆猶未拜告命故也恐重學者之疑
故詳及之

四年甲辰冬退之沒年五十七贈禮部尚書謚
曰文

是年正月敬宗即位 二月有王仲舒碑一
本云公諱弘中字某司馬公云實錄新舊傳

皆名仲舒字弘中又宴喜亭記稱王弘中則
弘中必字也仲舒貞元十年登賢良方正科
碑云貞元初射策拜左拾遺墓誌云貞元十
年按陸贄之貶在十一年春而陽城傳云裴
延齡讒毀陸贄等坐貶黜城率拾遺王仲舒
數人守延英上疏則墓誌云十年是矣 四
月張徹墓誌云其妻子以君之喪葬於某州
某所而祭文云無所掩葬輿窆東歸者徹初
被殺招魂而歸其後故人以幣請之范陽始
得歸葬也

按洪載張徹墓誌於今年載祭文於去年質之舊本墓誌實長慶三年祭文則當在元年也洪兩皆失之徹墓誌云其友侯雲長佐鄆使請於其帥馬僕射爲之選於軍中得故與君相知張孝恭元實者使以幣請之范陽范陽人義而歸之馬僕射馬總也總以長慶二年秋遷右僕射踰年之夏則召還矣徹死於長慶元年秋朱克融之變踰年則定固不應四年而後歸葬也舊本爲是又公祭

徹之日實爲兵部侍郎也其文云無所
掩葬輿竟東歸蓋聞訃之始也公爲兵
部實在元年而徹以元年七月死蓋祭
徹在是年之秋冬無疑矣併考正之以
俟知者

八月有孔戣墓誌 公行狀云正議大夫行
尚書吏部侍郎上柱國韓公四年疾病滿百
日罷以十二月卒於靖安里第載公屬纊語
曰愈伯兄德行高曉方藥食必視本草年止
於四十二愈踈愚食不擇禁忌位爲侍郎年

出伯兄十五歲如又不足於何而足且獲終
於牖下幸不至失節以下見先人可謂榮矣
明年張籍祭公詩云去夏公請告養疾城南
莊籍時官休罷兩月同游翔皇子陂岸西地
曠氣色清新池平四漲中有蒲荇香北臺臨
稻疇茂柳多陰涼板亭坐垂釣煩苦稍已平
共愛池上佳聯句舒遐情會有賈秀士來茲
亦間并移船入南溪東西縱篙棹盤回入潭
瀨下網截鯉魴踏沙掇小蔬樹下丞新粳日
來相與嬉不知暑景長月中登高灘星漢交

垂芒釣車擲長線有獲齊驩驚夜闌乘馬歸
衣上草露光公爲遊溪詩唱詠多慨慷自期
此終老結社於其鄉城南莊在長安城南公
之別墅也池上聯句集中無之游溪詩即南
溪始泛三首是也魯直於退之最愛此詩以
爲有詩人句律之深意蓋退之絕筆於此賈
秀士即島島有韓侍郎夜泛南溪詩又云籍
受新官誥拜恩當入城公亦同歸還居處隔
一坊籍長慶初爲國子博士二年爲水部今
秋爲國子司業也又曰公有曠達識生死爲

一網及當臨終晨意色亦不荒贈我珍重言
傲然委衾裳其於死生之際如此東坡云歐
陽永叔司馬君實范景仁皆不喜佛然其聰
明之所照了德力之所成就真佛法也愚於
退之亦云 皇甫湜云先生洞朗軒闢不施
戟級平居雖寢食未嘗去書怠以爲枕食以
飴口未嘗一日不對客閨人或晝見其面退
相指語以爲異事 行狀云氣厚性通議論
多大體與人交終始不易凡嫁內外及交友
之女無主者十人幼養於嫂鄭氏及嫂歿爲

之菴服以報之 舊史云少時與洛陽孟郊
東郡張籍友善名位未振愈不避寒暑稱薦
於公卿間而籍終成科第榮於祿仕後雖通
貴每退公之際則相與談讌論文賦詩如平
昔觀諸權門豪士如僕隸焉瞪然不顧大抵
以興起名教獎仁義爲事新史不詳著其語
今附于此然舊史旣云性弘通又云性褊僻
不若新史云性明銳不詭隨爲得其實也
舊史又云愈時恃才肆意南人妄以柳宗元
爲羅池神而愈碑以實之李賀父名晉愈爲

賀作諱辨令舉進士以此非愈按羅池事理
或有之未必柳人之妄也劇談錄云元和中
李賀善爲歌篇韓公深所知重於搢紳間每
加延譽由是聲華籍甚時元稹年少以明經
擢第常願交結賀一日執贄造門賀覽刺令
僕者謂曰明經及第何事來看李賀稹慙憤
而退其後稹制策登科日當要路及爲禮部
郎中因議賀父諱晉肅不合應進士舉文公
惜其才爲著諱辨以明之撫言亦云賀舉進
士或謗賀不避家諱文公特著諱辨一篇然

則賀嘗舉進士而元稹謗之也諱辯亦云賀
舉進士有名而唐史本傳云父名晉肅以是
不應進士愈爲作諱辯竟不就試非也退之
勸賀舉進士蓋惜其才耳何恃才肆意之有
孫伯野跋洪慶善年譜

右洪慶善所次昌黎年譜宣和壬寅夏得
於其叔成季觀其推次之工決知其學非
苟然者獨淮西事宜狀有可疑者按通鑑
元和九年閏八月丙辰少陽薨其子元濟
匿喪以病聞自領軍務九月元濟不迎弔

祭使發兵四出屠舞陽焚葉襄城十年春
正月縱兵侵掠及於東畿己亥制削元濟
官爵命宣武等十六道兵進討其後師久
未有功五月上遣中丞裴度詣行營察用
兵形勢度還言淮西必可取之狀考功郎
中知制誥韓愈上言謂克淮西在陛下斷
與不斷則是裴度察形勢還後退之方有
事宜狀狀中云去年春夏已來蓋謂少陽
未死前爾恐宜從通鑑六月九日孫傳伯

野父題

洪慶善年譜後記

僕初作昌黎年譜叙淮西事宜狀在元和九年孫公伯野辨其非是乙巳歲再加考正而增廣之興祖記

韓文類譜卷第七

卷之七

七

南宋慶元中建安魏仲舉刊韓集五百家注輯
呂程洪三家所撰譜記為七卷名曰韓文類譜
後無繼刊者故世罕得而見也廣陵馬君嶰谷
涉江耽嗜文史遍訪是譜于藏書家近始得之
因亟付梓以廣其傳當世多好學深思君子讀
譜而見其年經月緯之精密彌足為論世之助
矣類譜中有附錄六十餘條如引韓子寄贈三
學士及岳陽樓詩証陽山之貶乃為韋王之黨

所排謂都官之除在己丑六月十日皆莆田方
崧卿增考年譜之文朱子採入攷異可據餘亦
疑悉出崧卿譜雖不著其姓名然由朱子所採
可以例推且翫其文體亦諸條無異耳又方攷
亦有別見考異而是譜未採者蓋譜之所錄尚
非其全以兩君好古之深他日更購獲完本彙
刻派傳尤善矣

雍正庚戌春日長洲陳景雲識